



BIDANG FOKUS :

# ALAM SEKITAR



## BIDANG FOKUS: ALAM SEKITAR

# MEMULIHARA ALAM SEKITAR MELALUI USAHA BERSAMA



Semua pihak berperanan untuk menjalankan tanggungjawab masing-masing dalam memastikan alam sekitar dipelihara dan dipulihara agar fungsinya terjamin. Program Alam Sekitar diperkenalkan oleh Yayasan JCorp untuk menyokong Agenda ESG JCorp 2022-2026 yang melibatkan

komitmen JCorp dan syarikat Kumpulan secara menyeluruh.

Empat elemen penting dalam pelaksanaan program ini adalah Pemeliharaan dan Pemuliharaan Alam dan Sungai; Tanaman Pokok; Program Kitar Semula; serta Penjimatan Tenaga.

### Fakta Ringkas

Alam Sekitar





Antara program berkaitan Alam Sekitar yang telah dijalankan adalah seperti berikut:

### 1. Webinar Alam Sekitar Tanggungjawab Bersama

Bagi memberi kesedaran kepentingan Alam Sekitar kepada masyarakat, Yayasan JCorp dengan Kerjasama Jabatan Pendidikan Negeri Johor telah menganjurkan webinar bertajuk Alam Sekitar Tanggungjawab Bersama.

Objektif program ini adalah untuk mempromosi pendidikan alam sekitar kepada orang ramai di samping mewujudkan kesedaran tentang kepentingan menjaga alam sekitar.

Webinar ini turut menyaksikan perbincangan panel penceramah jemputan terdiri daripada Encik Muhamad Amirul Syafiq Khairuddin, Penolong Pengarah Unit Komunikasi & Sebaran Makluman Jabatan Alam Sekitar Negeri Johor dan Prof. Ir. Ts. Dr. Mohd Fadhil Md Din, Pengarah Pejabat Pelestarian Kampus, Universiti Teknologi Malaysia (UTM) Johor mengenai komitmen agensi Kerajaan dan universiti dalam Kelestarian Alam Sekitar. Webinar ini telah meraih sebanyak 1,200 tontonan.

### 2. Lebih 100 peserta jayakan program KUDAH di Pontian

Alam sekitar hari ini dipinjamkan oleh generasi akan datang. Oleh itu, komuniti harus sedar mengenai kepentingan menjaga kelestarian alam sekitar. Program Kutip Sampah Sambil Beriadah (KUDAH) diadakan untuk mempromosikan budaya mengutip sampah sambil beriadah.

Pada Jun 2022, Yayasan JCorp telah menyertai program tersebut yang berlangsung di tiga lokasi di Pontian, Johor iaitu Kampung Kukup Laut, Kampung Ayer Masin dan Kampung Benteng Kanan melibatkan 100 orang peserta termasuk pelajar dan anggota pekerja UTM, Majlis Daerah Pontian, Sukarelawan Sahabat YJC serta penduduk setempat. Ia dianjurkan dengan kerjasama Universiti Teknologi Malaysia (UTM) menerusi Pusat Pelestarian Alam Sekitar dan Sekuriti Air (IPASA) dan Research Institute for Sustainable Environment (RISE UTM), Johor Bahru.

Taklimat mengenai kesukarelawanan turut diadakan bersempena program tersebut bagi menarik minat orang ramai menyertai pasukan Sukarelawan Sahabat YJC.

Setakat ini, seramai 460 individu telah mendaftar sebagai sukarelawan Sahabat YJC dan pendaftaran sentiasa dibuka untuk yang berminat di laman sesawang: [www.yayasanjcorp.com.my](http://www.yayasanjcorp.com.my).

**// Program Kutip Sampah Sambil Beriadah (KUDAH) diadakan untuk mempromosikan budaya mengutip sampah sambil beriadah. //**



### 3. DSKom2022 pupuk cinta generasi muda kepada alam

Menjaga kelestarian alam sekitar termasuk kebersihan sungai dan mengawal sumber air itu daripada pencemaran ialah tanggungjawab semua pihak terutamanya dalam kalangan generasi muda.

Atas kesedaran dan tanggungjawab itu, Yayasan JCorp menyertai Program Denai Sungai Bersama Komuniti 2022 (DSKom2022) anjuran Universiti Teknologi Malaysia (UTM) dengan kerjasama Majlis Bandaraya Iskandar Puteri (MBIP) di Kampung Sungai Melayu, Johor pada 24 September 2022.

Program itu dianjurkan bersempena sambutan Hari Air Sedunia yang disambut pada 25 September setiap tahun.



Seramai 240 orang peserta terdiri daripada pelajar sekolah rendah dan menengah, penduduk setempat, pelatih Institusi Pendidikan Guru (IPG), pelajar Universiti Teknologi Malaysia (UTM) dan Sukarelawan Sahabat YJC terlibat dalam program tersebut.

Kampung Sungai Melayu merupakan destinasi ekopelancongan yang kerap menjadi lokasi penganjuran pelbagai aktiviti berkaitan kepentingan denai sungai, taman hidupan air, flora dan fauna. Oleh itu, penganjuran program seperti DSKom2022 yang bertujuan memupuk semangat generasi muda supaya mencintai dan menjaga kebersihan serta mengawal pencemaran sungai penting dalam usaha mempromosi Kampung Sungai Melayu sebagai sebuah perkampungan warisan di Johor, di samping menjamin kelestarian sungai tersebut.

Sejajar dengan SDG 13, Tindakan Iklim, Yayasan JCorp mengambil berat isu dan cabaran berkaitan alam sekitar di mana pelbagai inisiatif dirangka dan dilaksanakan menyokong matlamat kelestarian dan memulihara alam sekitar untuk generasi akan datang.

**// Menjaga kelestarian alam sekitar termasuk kebersihan sungai dan mengawal sumber air itu daripada pencemaran ialah tanggungjawab semua pihak... //**